

**Խ. Աբովյանի անվան հայկական պետական
մանկավարժական համալսարան հիմնադրամ**

ՀԵՏԱԶՈՏԱԿԱՆ ԱՇԽԱՏԱՆՔ

**Թեմա՝ Խաղային ուսուցանող իրավիճակների կիրառումը
որպես ավագ նախադպրոցականի
բնության մասին պատկերացումների ձևավորման միջոց**

**Կատարող՝ Երևանի թիվ 145 մանկապարտեզի դաստիարակ
Սեդա Պետրոսյան**

Ղեկավար՝ մ. գ. թ. Ա. Մ. Ավագյան

ԲՈՎԱՆԴԱԿՈՒԹՅՈՒՆ

Ներածություն

- 1. Խաղի ուսուցանող դերն ու նշանակությունը**
- 2. Բնության մասին պատկերացումների ձևավորման առանձնահատկությունները նախադպրոցական տարիքում**
- 3. Խաղային ուսուցանող իրավիճակների կիրառումն ավագ նախադպրոցականի բնության մասին պատկերացումների ձևավորման գործընթացում**
- 4. Հետազոտական աշխատանք**

Եզրակացություն

Գրականության ցանկ

Ներածություն

Նախադպրոցական տարիքում բնության մասին պատկերացումների, բնապահպանական մշակույթի ձևավորումը և էկոլոգիական դաստիարակությունը համարվում է կարևոր հիմնահարց: Բնության մասին պատկերացումների ձևավորումը բնապահպանական գիտելիքների, բնապահպանական մտածողության, բնության հանդեպ սիրո և պատասխանատու վերաբերմունքի ձևավորումն է, որն իրականացվում է բնության, շրջակա աշխարհի նկատմամբ հուզական դրական վերաբերմունքով, սեփական առողջության և շրջակա միջավայրի նկատմամբ պատասխանատու վերաբերմունքով, բարոյական չափանիշների պահպանմամբ և աշխատանքային դաստիարակությամբ: Այստեղից էլ բխում է նախադպրոցականի էկոլոգիական դաստիարակության նպատակը. երեխայի մեջ ձևավորել ճանաչողական, բնապահպանական գիտելիքներ, բնության մասին տարրական պատկերացումներ, էկոլոգիական գիտակցություն, հոգատար, մարդասիրական վերաբերմունք՝ բնության, շրջակա միջավայրի նկատմամբ, բնության հետ հաղորդակցվելու ունակություն, բնապահպանական կուլտուրա:

Ժամանակակից մանկապարտեզի կարևորագույն խնդիրներն են զարգացնել նախադպրոցականի սեփական անձի և շրջակա միջավայրի մասին պատկերացումներ, հաղորդել բնության մասին տարրական գիտելիքներ, ձևավորել բնության մասին նախնական պատկերացումներ, նպաստել իմացական գործընթացների, ճանաչողական հետաքրքրությունների, հաղորդակցական հմտությունների զարգացմանը:

Բնության մասին պատկերացումների ձևավորման լավագույն միջոցներից մեկը հանդիսանում է խաղը, որը նպաստում է երեխաների ճանաչողական ոլորտի, ստեղծագործական ունակությունների և բնության հանդեպ հետաքրքրության ձևավորմանը:

Այս գործընթացում կարևորվում են հատկապես ուսուցման փոխգործուն մեթոդների և խաղային ուսուցանող իրավիճակների կիրառումը, որոնք առավելագույնս նպաստում են երեխաների ինքնուրույնության, տարբեր իրավիճակներում ճիշտ կողմնորոշման, համագործակցության հմտությունների ձևավորմանը,

ուսումնադաստիարակչական գործընթացը դարձնում են ավելի հետաքրքիր, ստեղծագործ և արդյունավետ:

Հետազոտության նպատակն է՝ ուսումնասիրել և վերլուծել խաղային ուսուցանող իրավիճակների կիրառման առանձնահատկություններն ավագ նախադպրոցականի բնության մասին պատկերացումների ձևավորման գործընթացում:

Հետազոտության խնդիրներն են.

Վերլուծել նախադպրոցականի բնության մասին պատկերացումների ձևավորման հասկացության էությունը:

Ուսումնասիրել խաղային ուսուցանող իրավիճակների կիրառման առանձնահատկությունները:

Իրականացնել հետազոտական աշխատանք:

Հետազոտության ընթացքում կիրառել ենք դիտում, զրույց, խաղային իրավիճակներ մեթոդները:

1. Խաղի ուսուցանող դերն ու նշանակությունը

Խաղը մարդկային գործունեության անենահետաքրքիր ձևերից մեկն է, այն ծագում է մանկության շրջանում և ուղեկցում մարդուն ողջ կյանքի ընթացքում:

Խաղի հիմնախնդիրը մշտապես հետաքրքրել է ոչ միայն հոգեբաններին և մանկավարժներին, այլև փիլիսոփաներին, հասարակագետներին, ազգագրագետներին, կենսաբաններին և հոգեթերապևտներին: Քննարկելով խաղային գործունեությունը տարբեր տեսանկյուններից գիտնականները միահամուռ նշում են, որ խաղը մարդկային մշակութային համակարգի ուրույն և անբաժանելի մասն է:

Խաղի դերն ու նշանակությունը նախադպրոցականի կյանքում մանրամասն ուսումնասիրվել և քննարկվել է հոգեբանության և մանկավարժության ականավոր գիտնականներ՝ **Լ.Ա.Վիգոտսկու, Ա.Լ.Ռուբինշտեյնի, Ա.Ն.Լեոնտևի, Դ.Բ.Էլկոնինի, Լ.Ա.Վենգերի, Ռ.Ի.ժուկովսկայայի, Ա.Պ.Ուսովայի** և ուրիշների կողմից: Նրանք խաղը դիտում են որպես երեխայի համակողմանի զարգացման, ինքնահաստատման և ինքնակատարելագործման կարևորագույն միջոց: Նշում են խաղային գործունեության պատմական ծագումն ու սոցիալական բնույթը [2, 95]:

Խաղի ժամանակակից տեսությունը կառուցվում է խորհրդային հոգեբանամանկավարժության տեսական դրույթների հիման վրա, որոնք լրամշակվում են մանկավարժական նորագույն մոտեցումներով: Համաձայն նախադպրոցական դաստիարակության հայեցակարգի, խաղն իրենից ներկայացնում է ինքնարժեք գործունեություն, որը շնորհում է նախադպրոցահասակ երեխային ներքին ազատության և ինքնուրույնության զգացողություն, ցանկալին իրողություն դարձնելու վստահություն, իրականության իր տեսանկյունից նշանակալի կողմերը կրկին վերապրելու, հաճույք և բավարարվածություն զգալու լայն հնարավորություններ: Խաղային գործունեության ընթացքում երեխայի համար ստեղծվում են լավագույն պայմաններ (ազատ և բնական միջավայր, հուզական ներդաշնակություն, հավասարության մթնոլորտ)՝ հասակակիցների միջավայրում «այստեղ և անհապաղ» ինքնահաստատվելու համար: «Այստեղ և անհապաղ» ինքնահաստատվելու հնարավորությունը երեխայի խաղային գործունեության

հիմնական **դրդապատճառն է**, հետևաբար երեխաների խաղային գործունեության կազմակերպան և կառուցման գլխավոր սկզբունքը: Յուրաքանչյուր խաղացող երեխա առաջին հերթին ջանում է ինքնահաստատվել հասակակիցների միջավայրում, և խաղի առավելությունը, մանկան գործունեության այլ ձևերի համեմատությամբ այն է, որ խաղում կան ինքնահաստատվելու բոլոր հնարավորությունները: Խաղային գործունեության նշված բնութագիրը խոսում է այն մասին, որ այն իրենից ներկայացնում է ներքին պահանջմունքներով պայմանավորված գործունեություն, որն ունի յուրաքանչյուր երեխայի համար սուբյեկտիվ՝ ներանձնային նշանակություն և արժեք: Խաղն, իսկապես, ինքնարժեք գործունեություն է և բացարձակ անփոխարինելի է նախադպրոցականի կյանքում: Որևէ այլ գործունեություն չունի խաղային գործունեության նշված առավելությունները: Այսպիսով, խաղային գործունեությունը նախադպրոցականի անձնավորության կայացման ներքին գործոն է, որը չի կարող ամբողջապես բացատրվել և ընդհանրացվել, այն բավական սուբյեկտիվ է: Միևնույն ժամանակ, խաղային գործունեությանը բնորոշ է օբյեկտիվ մանկավարժական նշանակություն: Խաղն ուղղված է նախադպրոցական տարիքի երեխաների ընդհանուր զարգացմանը, օրինաչափորեն նպաստում է նրանց հոգեկանի զարգացմանը, հուզազգացմունքային ոլորտի հարստացմանը, հասակակիցների հետ փոխհարաբերությունների հաստատմանը, սեփական սոցիալական փորձի ձեռքբերմանը:

Խաղը նախադպրոցականի զարգացման և դաստիարակության արդյունավետ միջոց է և նրա հետագա զարգայման հիմնական գրավականը: Միավորելով խաղային գործունեության սուբյեկտիվ արժեքը և զարգացնող օբյեկտիվ նշանակությունը՝ կարելի է եզրակացնել, որ խաղը նախադպրոցական տարիքի երեխաների կյանքի և գործունեության կազմակերպման ամենանահարմար ձևն է: Համոզվելու համար նշվածում, փորձենք մանրամասն քննարկել խաղային գործունեության **հիմնական առանձնահատկությունները**:

1. Խաղային գործունեության ընթացքում բավարարվում են նախադպրոցականի հիմնական պահանջմունքները՝ ակտիվության և ինքնուրույնության, հաղորդակցման և մեծահասակների կյանքին անմիջականորեն հաղորդակից լինելու, արտաքին

աշխարհը ճանաչելու և այն արտացոլելու: Ինչպես նշում էր **Կ.Դ.Ուշինսկին**, երեխան խաղի ընթացքում փորձարկում է իր ապագա կյանքը և «փորձում սեփական ուժերը»:

2. Խաղային գործունեության ընթացքում բնականոն ճանապարհով զարգանում են երեխայի հոգեկան գործընթացները, ձևավորվում են նորագոյացություններ, որոնք նախապատրաստում և ապահովում են երեխայի հոգեկանի զարգացման հաջորդ փուլը:

3. Խաղային գործունեությունը նպաստում է գործունեության նոր ձևերի՝ աշխատանքի և ուսումնական գործունեության, առանձնացմանը: Երեխայի խաղն իր զարգացման ընթացքում ձեռք է բերում աշխատանքային և ուսումնական գործունեությանը բնորոշ կառուցվածքային տարրեր՝ **նպատակ, պլանավորում, արդյունք, որոնք, ձևավորվելով խաղային գործունեության ընթացքում, տեղափոխվում են գործունեության այլ ձևեր:**

4. Խաղային գործունեությունը բնական գործունեություն է, ուր չկա ճնշում և հարկադրանք, առկա է երեխաների համար բնական միջավայր: Խաղի ընթացքում երեխաներն ազատ են և ինքնուրույն, ունեն հավասար իրավունքներ և ինքնադրսևորման լայն հնարավորություններ:

5. Խաղը ստեղծագործական գործունեություն է, քանի որ այն նպաստում է յուրաքանչյուր խաղացող երեխայի անհատական առանձնահատկությունների բացահայտմանը և **կրեատիվ (ստեղծագործական) ընդունակությունների զարգացմանը:** Խաղի ընթացքում են լավագույնս դրսևորվում, հետևաբար և ախտորոշվում երեխայի ժառանգական նախադրյալները, հակումներն ու հետաքրքրությունները:

6. Խաղը աշխարհանաչման և աշխարհի արտացոլման եղանակ է, իմացական գործունեություն: Խաղային գործունեության ընթացքում ձեռբերած գիտելիքները կրկնակի արժեքավոր են՝ դրանք և տեղեկատվական են և գործնական բնույթի: Գիտելիքի՝ խաղում անմիջապես կիրառվելու կամ փորձարկելու հնարավորությունը, նպաստում է դրա յուրացմանը և ամրապնդմանը, խաղի ընթացքում ձեռբերած գիտելիքները չափազանց կայուն են:

7. Խաղային գործունեությունն իր բնույթով ուղղված է նախադարոցականի հուզականային ոլորտի զարգացմանը, հետևաբար և հիմնարար անձնային որակների

ձևավորմանը: Նախադպրոցականի անձնավորության ձևավորման գործընթացը պայմանավորված է նրա **հուզական և կամային ոլորտների** ներդաշնակ զարգացմամբ, ինչը լավագույնս ապահովվում է խաղային գործունեության ընթացքում [2, 96]:

Խաղը դիտարկվում է որպես առաջատար գործունեություն ոչ այն պատճառով, որ այն երեխայի կյանքում մեծ տեղ է գրավում, այլ որովհետև խաղի ընթացքում երեխայի հոգեկանում տեղի են ունենում գլխավոր փոփոխությունները, զարգանում են այն գործընթացները, որոնք անհրաժեշտ են զարգացման նոր առավել բարձր աստիճանների հասնելու համար: Խաղալով երեխան անընդհատ ձգտում է գնալ առաջ, նրա մոտ միաժամանակ աշխատում են ենթագիտակցությունը, խելքը և երևակայությունը, հետևաբար երեխաների զգացմունքային ոլորտի զարգացումը, ինչպես նաև մտավոր կարողությունների զարգացումն ավելի արդյունավետ կատարում են խաղի մեջ:

Խաղի բովանդակությունը ծառայում է ուսումնական խնդրի կատարմանը, որտեղ կարևոր է նաև դաստիարակչական կողմը: Հարկ է նշել, որ խաղը կարելի է դիտարկել և՛ որպես ուսուցման խաղային մեթոդ, և՛ որպես ուսուցման ձև, և՛ որպես երեխայի անձի զարգացման միջոց: Այն պետք է դիտել որպես ուսումնական գործընթացի կազմակերպման ձև: Երբ ուսուցումը համեմվում է խաղերով, երեխաների համար այն դառնում է ավելի հետաքրքիր, սրտամոտ ու ցանկալի: Խաղային մթնոլորտը հնարավորություն է տալիս, որ հետաքրքիր, սրտամոտ ու ցանկալի: [7]:

Ժամանակակից ՆՈՒՀ-ում ուսումնադաստիարակչական գործընթացի իրականացման նպատակով անհրաժեշտ է գտնել ուսուցման այնպիսի հնարներ, որոնք ոչ միայն սիրելի ու հետաքրքիր լինեն երեխաների համար, այլև ունենան ուսուցողական, ճանաչողական նշանակություն և միաժամանակ խթանեն ինքնուրույնության ձևավորմանը և ստեղծագործականության զարգացմանը: Նախադպրոցական տարիքում այդպիսի լավագույն միջոց է խաղը, խաղային ուսուցանող իրավիճակների ստեղծումը:

2. Բնության մասին պատկերացումների ձևավորման առանձնահատկությունները նախադպրոցական տարիքում

Էկոլոգիական դաստիարակությունը 21-րդ դարում կարևոր է մոլորակի և մարդկության համար: Բնության նկատմամբ վերաբերմունքը, էկոլոգիական պատկերացումները պետք է ձևավորել դեռ նախադպրոցական տարիքից: Անհրաժեշտ է ծանոթացնել երեխաներին բնության հետ, սովորեցնել շրջակա միջավայրի խնամքի կարևորությունը և կանոնները, հոգատարություն սերմանել շրջակա միջավայրի՝ ծառերի, խոտերի, կենդանիների և բնության մաս կազմող յուրաքանչյուր տարրի նկատմամբ: Երեխան պետք է հասկանա, որ ինքը բնության մի մասնիկն է: Նախադպրոցական տարիքից բնության հանդեպ վերաբերմունքը և էկոլոգիական հիմնարար պատկերացումները ձևավորելը խիստ անհրաժեշտ է [3, 19]:

Էկոլոգիական դաստիարակությունը երեխայի էկոլոգիական գիտակցության և մտածելակերպի ձևավորման, էկոլոգիական վարքագծի և մշակույթի (վարվելակերպի) դաստիարակչական գործընթաց է:

Ավագ նախադպրոցական տարիքի երեխաները չեն սահմանափակվում առանձին կոնկրետ փաստերի յուրացմամբ, այլ ձգտում են թափանցել իրերի էության մեջ, հասկանալ երևույթների կապը: Դրա շնորհիվ էլ հնարավոր է դառնում պատկերացումների և պարզագույն հասկացությունների ձևավորումը, որոնք կարող են դառնալ գիտելիքների համակարգի միջուկը:

Գիտական հետազոտություններով ապացուցված է, որ ավագ նախադպրոցականներն անցում են կատարում ընդհանուր պատկերացումներից դեպի կոնկրետ մտածողությունը: Զարգանում են երևակայությամբ առարկաները համեմատելու, նրանց ընդհանուր հատկանիշներով ընդհանրացնելու, իր մտքերը բանավոր ձևակերպելու և որոշակի դատողություն անելու կարողությունները: Մի շարք հեղինակների հոգեբանամանկավարժական հետազոտությունները ապացուցում են ավագ նախադպրոցականների կողմից բնության մեջ առկա տարբեր փոխադարձ կապերի, կախվածությունների յուրացման հնարավորությունները:

Այսպես, օրինակ, **Ս.Ն. Նիկողոսյանի** հետազոտությունները ցույց են տվել, որ ավագ նախադպրոցականներն ունեն բնության բազմաբնույթ փոխկախվածությունների ընկալման մեծ հնարավորություններ: Նա գտնում է, որ էկոլոգիական պատկերացումների ձևավորումը կարող է ընթանալ ողջ նախադպրոցական տարիքում, բայց կրտսեր նախադպրոցական տարիքում երեխաները կարող են ըմբռնել միայն եզակի կապերը, այն դեպքում, երբ ավագները կարող են ըմբռնել համալիր հատկանիշների կապերը [5, 37]:

Ե. Ֆ. Տերենտևան նույնպես հիմնավորում է, որ ավագ նախադպրոցականները ընդունակ են բացահայտելու ավելի բարդ կապեր և կապերի շղթաներ, մի շարք կենսացենոզային կապեր անտառային համակեցությունների, մարգագետինների, ջրամբարների ներսում, թռչունների չվելու պատճառները, կենդանիների և բույսերի կյանքի կախվածությունը միաժամանակ մի քանի գործոններից: Այսինքն՝ ավագ նախադպրոցականների մեջ արդեն ձևավորվում է նրանց շրջապատող բնության բավականին ճիշտ և ամբողջական պատկերը: Ժամանակակից նախադպրոցականը տիրապետում է բնության մասին պատկերացումների, գիտելիքների բավականին ընդարձակ ծավալի: Միայն թե հաճախ այդ գիտելիքները ձևավորվում են տարերայնորեն, հեռուստահաղորդումների, գովազդերի, մուլտֆիլմերի, հեքիաթների ազդեցությամբ:

Է. Ալեքսանդրյանը և ուրիշները նշում են. «Նախադպրոցական տարիքի երեխայի մտավոր դաստիարակության կարևորագույն խնդիրն է երեխաներին գիտելիքներ տալ բնության մասին: Այդ գիտելիքներն օգնում են բացահայտել, հասկանալ երևույթները, նրանց մեջ եղած էական կապերը, պատկերացումներ կազմել իրականության այս կամ այն բնագավառի առավել կարևոր կողմերի, օրինաչափությունների մասին» [2, 87]:

Ավագ նախադպրոցական տարիքում ձևավորվում են հիմնական մտածական կարողությունները, ինչպես նաև մտածական գործողություններ կատարելու ընդունակությունը (համեմատում, վերլուծություն, ընդհանրացում, դասակարգում), սկզբնավորվում է վերացական մտածողությունը, ըմբռնելի են դառնում պատճառահետևանքային կապերը: Այս տարիքում կարևորագույն խնդիրներից է ճանաչողական հետաքրքրության և իմացական կարողության՝ որպես ուսումնական

գործունեության դրդապատճառի ձևավորումը: Էկոլոգիական դաստիարակության դրդապատճառներից են նաև երեխայի ճանաչողական ակտիվությունը և շրջապատող միջավայրի հուզական ընկալումը:

Շարունակական էկոլոգիական կրթության համակարգի նախադպրոցական փուլի կազմակերպման յուրահատկությունը պայմանավորված է այդ տարիքի համար բնորոշ գործունեության հիմնական ձևով՝ խաղով: Ձևավորվում է նախադպրոցականների ներքին դիրքորոշումը շրջապատի մարդկանց նկատմամբ, զարգանում է սեփական «ես»-ի և սեփական արարքների նշանակության գիտակցումը: Ի տարբերություն կրտսեր նախադպրոցականների՝ փոխվում է ավագ նախադպրոցականների սոցիալական կարգավիճակը (դերը), որն արտացոլվում է գործունեության ձևի փոփոխման մեջ, առաջին հերթին՝ սյուժետադերային խաղերում: Ավագ նախադպրոցականի մեջ ի հայտ է գալիս տարրական պարտականությունների կատարման անհրաժեշտության զգացումը. նա ընդունակ է ինքնուրույն կատարելու մեծահասակի ցուցումները, բացի այդ, երեխայի մեջ ծագում է շրջապատի կողմից ճանաչվելու անհրաժեշտություն: Այս առումով էլ կարևոր է, որ հենց այս տարիքում ձևավորվեն երեխայի էկոլոգիական գիտակցությունն ու մշակույթը, ինչպես նաև բնության և մարդկանց նկատմամբ սեփական արարքները վերլուծելու ունակությունը: Էկոլոգիապես գրագետ մարդ դաստիարակելու համար կարևոր է դեռևս ավագ նախադպրոցական տարիքում երեխայի զարգացմանը խթանող պայմանների ապահովումը:

Էկոլոգիական դաստիարակության խնդիրների իրականացման արդյունավետությունն ակնհայտ է դառնում, եթե երեխաներին հաղորդվող բնապահպանական գիտելիքները պայմանականորեն համակարգվեն 2 խմբի մեջ.

1) Բնության երևույթների պատճառահետևանքային կապերի վերաբերյալ գիտելիքներ, որոնք կընդլայնեն երեխաների մտահորիզոնը, կնպաստեն երեխաների մտավոր զարգացմանը

2) գիտելիքներ, որոնց շնորհիվ կձևավորվեն հմտություններ, կարողություններ, որոնք կորոշեն երեխաների վարքի դրսևորումները: Մենք պետք է խորապես գիտակցենք էկոլոգիական կրթության ու դաստիարակության կարևորությունը, նպատակներն ու խնդիրները, իրականացման ուղիներն ու միջոցները [4, 51]:

Այսպիսով՝ անընդհատ էկոլոգիական կրթության և դաստիարակության համակարգում նախադպրոցական շրջափուլը տարբերվում է մյուս աստիճաններից երեխաների հոգեֆիզիոլոգիական առանձնահատկություններով, նրանց ընկալման և աշխարհի մասին գիտելիքների յուրացման ընդունակություններով: Մի շարք հեղինակներ նախադպրոցականների էկոլոգիական կրթությունն ու դաստիարակությունը դպրոցին նախապատրաստելու ճանապարհին դիտում են որպես առաջին և կարևոր փուլ, որպես անձի զարգացման անգնահատելի գործոն:

3.Խաղային ուսուցանող իրավիճակների կիրառումն ավագ նախադպրոցակա նի բնության մասին պատկերացումների ձևավարման գործընթացում

Նախադպրոցականի ուսումնադաստիարակչական գործընթացում խաղն ունի երեք գործառույթ.

- <<Առաջին, ամենապարզ գործառույթը ուսումնական գործընթացը թեթևացնելն և այն աշխուժացնելն է: Այս դերը կատարում են խաղում տեղ գտած հեքիաթային, երևակայական տարրերը, հետաքրքրաշարժնկարներն ու ուշագրավ բնագրերն և այլն:
- **Երկրորդ** գործառույթը երևակայության զարգացումն է ուսումնական գործընթացի թատերականացման ճանապարհով:
- **Երրորդ** գործառույթը **մրցութային է**: Խաղերը, սովորոբար մրցութային, մրցանակաբաշխութային տարրեր են պարունակում, որոնք երեխաներին ակտիվացնում են, ձևավորում առաջատարության ձգտում:

Խաղի նշված երեք գործառույթներն իրենցից ներկայացնում են խաղից, զվարճանքից ուսուցում գնացող աստիճաններ: Նախադպրոցական տարիքում առավել կարևորում են խաղերի դերը երեխաների մտավոր գործունեության ակտիվացման ոլորտում, այսինքն՝ խաղերի ուսուցանող, զարգացնող գործառույթը:

Խաղի ժամանակ երեխաները հաճույքով են հաղթահարում ծագած զգալի դժվարությունները, փորձում են իրենց ուժերը, զարգացնում ընդունակություններն ու տարաբնույթ ունակությունները: Խաղը ցանկացած ուսումնական նյութի յուրացման գործընթաց դարձնում է հետաքրքրաշարժ, գործունեությունը՝ գրավիչ, ստեղծում աշխատանքային տրամադրություն, թեթևացնում գիտելիքների և կարողությունների ձեռքբերման գործընթացը: Սակայն ոչ բոլոր խաղերն ունեն արժեքավոր կրթադաստիարակչական նշանակություն. այն խաղերն են արդյունավետ, որոնք երեխաներին ընձեռում են ճանաչողական գործունեություն ծավալելու հնարավորություն, այսինքն ուսուցանող են, երեխայի անձնը զարգացնող են:

Անդրադառնալով էկոլոգիական դաստիարակության գործընթացին, պետք է նշենք, որ այն կազմակերպվում է մեծահասակների կողմից և իրականացվում է մի շարք միջոցներով: Հիմնական միջոցը բնությունն է, բնության հետ շարունակական շփումը: Երեխայի մշտական կապը բնության հետ ապահովվում է մանկապարտեզի «բնության անկյան» միջոցով, երեխան մեծահասակների օգնությամբ ծանոթանում է բնության երևույթներին, ինքնուրույն հետևում է բնության մեջ տեղի ունեցող փոփոխություններին, առանձնացնում է կենդանի և անկենդան բնության տարբերությունները, դրանց մեջ եղած կապը: Դիտարկումը երեխային բնության հետ ծանոթացնելու հիմնական մեթոդն է: Խաղային ուսուցանող իրավիճակները ևս կիրառելի են երեխաների բնության մասին պատկերացումների ձևավորման գործընթացում, դրանք առավելագույնս նպաստում են երեխաների ինքնուրույնությանը, արագ կողմնորոշմանը, ճանաչողական հետաքրքրությունների զարգացմանը [1]:

Հատուկ կազմակերպված պարապմունքներից բացի էկոլոգիական գիտելիքներ կարող են փոխանցվել խաղ-պարապմունքների, խաղ-վիկտորինաների, պարապմունք-բանավեճերի և ուսուցման այլ ձևերի միջոցով: Արդյունավետ է նշված հիմնական միջոցների համատեղ կիրառումը բնության գրկում: Պարապմունքների համակարգում իր ուրույն տեղն է գրավում համալիր պարապմունքը, որը չափազանց

արդյունավետ է նաև նախադպրոցականի էկոլոգիական դաստիարակության ընթացքում: Էկոլոգիական դաստիարակության կազմաերպման ձևերն են.

-Էքսկուրսիաներ և արշավներ,

-բացօդյա կամ բնության գրկում կազմակերպվող հանդեսները ու տոնակատարությունները,

-բնաճանաչողական տոնահանդեսները /ծաղկի տոն, բերքահավաքի տոն, վարդավառ, գարնանը ծառերի բողբոջման տոն/

-Էկոլոգիական բնույթի միջոցառումները՝ շաբաթօրյակները, ծառատունկը, միջավայրի բարեկարգումը և այլն:

- Խաղային ուսուցանող իրավիճակները, որոնք ունեն էկոլոգիական ուղղվածություն [6]:

Էկոլոգիական դաստիարակության արդյունքում երեխան սովորում է սիրել բնությունը և խնամքով վերաբերվել նրան, հասկանում է բնության բոլոր օղակերի փոխալայմանավորվածությունը և գիտակցում բնապահպան գործունեության անհրաժեշտությունը:

Հետազոտական մաս

Մանկապարտեզի ուսումնադաստիարակչական գործընթացում կարևորում ենք խաղերը և առաջարկում գործածել հատկապես այն ժամանակ, երբ անհրաժեշտ է երեխաների ուսումնասիրած նյութի յուրացման մակարդակը հասցնել գիտակցական աստիճանի: Խաղային իրավիճակների մանկավարժական արժեքն այս դեպքում այն է, որ խաղային ակտիվանում են երեխաների ինքնուրույն, համագործակցային, մտավոր գործունեությունը և ճանաչողական հետաքրքրությունները:

Վաղուց և բազմաթիվ ուսումնասիրություններով ապացուցված է, որ խաղերին նախադպրոցականների մասնակցությունը նպաստում է նրանց ինքնահաստատմանը, ինքնադրսևորմանը, ինքնաիրացմանը, տարբեր դրդապատճառներով պայմանավորված՝ դրանք ձևավորում են հաջողության, հաղթանակի հասնելու կայուն ձգտումներ, կամային որակներ:

Տեսական ուսումնասիրությունները հիմք ընդունելով կատարվել է հետազոտական աշխատանք ուղղված ավագ նախադպրոցականների բնության մասին պատկերացումների ձևավորման գործընթացում խաղային ուսուցանող իրավիճակների կիրառման արդյունավետությանը: Այս առումով մեր կողմից ընտրվել են մի քանի ուսուցանող խաղեր և ստեղծվել են խաղային ուսուցանող իրավիճակներ:

Էկոլոգիական բնույթի խաղերը նպաստում են երեխաների էկոլոգիական գիտակցության ձևավորմանը: Խաղերի թեման պետք է լինի երեխայի շրջակա միջավայրին նվիրված, բնության մեջ իրեն պահելու վարքի կանոնները, բնության օգտակարության, ինչպես նաև նրան հասցված վնասի հետևանքները: Առանձին շեշտադրում ունեն խաղային գործունեության այնպիսի ձևերի կազմակերպումը, որոնց շնորհիվ երեխայի մեջ ներդրվում են բարոյական վարքագծի ձևավորման, բնության, իրար նկատմամբ պատասխանատվության հիմքերը:

Մեր կողմից կազմակերպվել են ծրագրով նախատեսված է էկոլոգիական խաղերից մի քանիսը.

«Ճանաչիր միջավայրդ»,

«Ո՞վ ինչ ձայն է հանում»,

«Իմացիր, ի՞նչ կա պարկում»,

«Կարմիր, կանաչ, դեղին տերևներ»,

«Իմացիր, ի՞նչ ծառի տերև է»:

Ստեղծվել են նաև խաղային ուսուցանող իրավիճակներ, որոնց ընթացքում երեխաները ձեռք են բերել էկոլոգիական գիտելիքներ.

- Երեխաներին բաժանել ենք լոտոյի խաղաքարտեր ,որտեղ պատկերված են տարբեր կենդանիներ, ընթերցել ենք հանելուկ որեւէ կենդանու մասին երեխաները պետք է գուշակեն և քարտը դնեն այդ կենդանու պատկերի վրա: Այնուհետև առաջարկում ենք երեխաներին նշել նաև այդ կենդանու մասին այլ տվյալներ:
- Երեխաներին առաջարկում ենք լսել կենդանիների ձայները և գուշակել թե որ կեդանին է այդպես ձայն հանում:

- Երեխաները մեկը մյուսի ականջին ասում են մի կենդանու անուն և նա առանց ձայն հանելու շարժումներով ցույց է տալիս կենդանուն և խմբի երեխաները պետք է գուշակեն:
- Ներկայացրեցինք մի իրավիճակ մեր շրջապատող միջավայրի աղտոտվածության հետ կապված: Նախ հարցերի միջոցով զրուցեցինք երեխաների հետ թե ինչպես պետք է վերաբերվենք բնությանը, ինչ անենք այն ավելի մաքուր և գեղեցիկ պահպանելու համար, մաքուր օդ շնչելու համար: Հարցերի պատասխանները լսելուց հետո առաջարկեցինք նրանց խաղարկել մի իրավիճակ: Խնդրեցինք պատկերացնել, որ իրենք գնացել են գետակի մոտ, սակայն տեղ չկա նստելու և շուրջբոլորն աղբ է թափված: Խնդրեցինք երեխաներին ասել, թե նրանք ինչ կանեին, որպեսզի մարդիկ կարողանային նստել գետի ափին: Ինչպես կարող ենք ապահովել մեր շրակա միջավայրի մաքրությունը:

Կիրառված էկոլոգիական խաղերի ու խաղային իրավիճակների արդյունքում կարող ենք ասել, որ խաղերը երեխաների համար բավականին հետաքրքիր էին, նրանք սիրով մասնակցում էին, ակտիվ էին և ունեին բավականին լավ գիտելիքներ մեզ շրջապատող աշխարհի և էկոլոգիական վատթարագույն վիճակի մասին: Կարողանում էին առաջարկել լուծումներ առաջադրված հարցերին:

Եզրակացություն

Խաղի դերը նախադպրոցական տարիքում ունի առավել ուսուցանող, զարգացնող և դաստիարակող գործառույթներ, քան մարդու հասուն տարիքում: Մասնավորապես, ուսումնասիրության առարկա է երեխայի խաղային գործունեությունը գիտելիքների և կարողությունների ձեռքբերման գործընթացում, երբ խաղը հանդես է գալիս որպես ուսուցման մեթոդ՝ այդ համակարգի մեջ գրավելով համարժեք տեղ:

Խաղային գործունեությունը բնական գործունեություն է, ուր չկա ճնշում և հարկադրանք, առկա է երեխաների համար բնական միջավայր: Խաղի ընթացքում երեխաներն ազատ են և ինքնուրույն, ունեն հավասար իրավունքներ և ինքնադրսևորման լայն հնարավորություններ: Խաղն ապահովում է հուզականությամբ հագեցած հաճելի մթնոլորտ և համագործակցելու լավագույն պայմաններ:

Երեխային շրջապատող միջավայրի էկոլոգիական համակարգի բոլոր մակարդակները միմյանց և երեխաների հետ գտնվում են փոխազդեցության մեջ և նպաստում են անձի ձևավորմանը: Էկոլոգիական դաստիարակության գործընթացում ձևավորվում է խնդիրների մի ամբողջական համակարգ, որի լուծման համար անհրաժեշտ են կոնկրետ գործողություններ: Դրանց իրականացումը թերի կլինի, եթե կրթական համակարգի հաստատություններին աջակից չլինեն և իրենց ուժերը չմիավորեն հասարակական կազմակերպությունները: Էկոլոգիական դաստիարակության նպատակն է ամբողջ մոլորակի և հարազատ երկրի շահերն ու ապագան հետազայում պաշտպանելու կոչված փոքրիկ քաղաքացու ձևավորման գործը:

Միջին նախադպրոցական տարիքում երեխաներին պետք է տալ բնապահպանական գիտելիքների ծավալ, որը նրանց հնարավորություն է ընձեռում ճանաչել, սիրել ու գնահատել շրջակա աշխարհը, հասկանալ բնության մեջ իրենց ճիշտ դրսևորելու անհրաժեշտությունը, պահպանել որոշակի բարոյական նորմեր և զգալ իրենց բնության մի մասնիկը: Մանկապարտեզում իրականացվող բնապահպանական դաստիարակչական գործընթացը նպաստում է էկոլոգիական կուլտուրայի ձևավորմանը: Դա էլ իր հերթին դառնում է մարդկային ընդհանուր կուլտուրային

հաղորդակից դառնալու, նյութական և հոգևոր արժեքների պահպանմանը միտված շարժիչ ուժ:

Կարող ենք փաստել, որ բնապահպանական դաստիարակության իրականացումն ավելի արդյունավետ է, երբ այն իրականացվում է խաղային գործունեության և հատկապես ուսուցանող խաղային իրավիճակների ստեղծման պայմաններում: Նման մոտեցումն իր հերթին նպաստում է նաև երեխաների ինքնուրույնության, ստեղծագործաանության, բնությունն էլ ավելի արժևորելու հմտությունների զարգացմանը: Էկոլոգիական կրթության բովանդակության մեջ բնության մասին պատկերացումների ձևավորումը նպաստում է երեխայի շրջակա միջավայրում իր տեղի գիտակցմանը, նրա էկոլոգիապես գրագետ վարքագծի ունակությունների մշակմանը:

Գրականության ցանկ

1. Ասատրյան Լ. Թ. Սարգսյան Փ.Ա. Նախադպրոցական եւ կրտսեր դպրոցական տարիքի երեխաների էկոլոգիական կրթությունն ու դաստիարակությունը: Երեւան 2002.
2. Մարության, Դալլաքյան, Նախադպրոցական մանկավարժություն, Երևան 2008.
3. Մարտիրոսյան Գ. էկոլոգիական դաստիարակությունը նախադպրոցական տարիքում: Երեւան 2007.
4. Вакуленко Ю.А. Воспитание любви к природе у дошкольников:экологические праздники, викторины, занятия и игры. – Волгоград: Учитель,2008.
5. Николаева С. М., Теория и методика экологического образования детей, изд. центр "Академия" 2002.
6. <https://gayanepirumyan.wordpress.com/2020/03/31/%D5%A3%D5%A1%D5%B5%D5%A1%D5%B6%D5%A5-%D6%83%D5%AB%D6%80%D5%B8%D6%82%D5%B4%D5%B5%D5%A1%D5%B6%D5%AB-%D5%A2%D5%AC%D5%B8%D5%A3/>
7. <https://multiurok.ru/files/khaghayin-tekhnologianer.html>